



23. januar 2015

UPA 2015/140

Inatsisartut Suleriaasianni § 36 naapertorlugu apeqquteqaat tunngavigalugu oqallinnissamik imaattumik siunnersuuteqarpunga:

**Kommunit akornanni aningaasaqarnikkut naligiissarinerup sunik tunngaveqarluni sunillu siunertaqarluni pisarnissaanik oqallinnissamut siunnersuut**  
(Inatsisartunut ilaasortat, Inuit Ataqatigiit)

Kommunit akornanni aningaasaqarnikkut naligiissarineq tupinnanngitsumik naalakkersuinikkut aalassassutaallunilu aporaassutaavoq. Naak kikkut tamarmik naligiissari-sariaqarnermut isumaqataagaluartut naligiissariniarnermi peruserineqartut amerlasuunit, politikerinit allanillu isorineqarput. Tamatuma saniatigut sumiluunniit najugaqaraluarutta tamatta inuttut ataasiakkaatut naligiissarinerup qanoq iluseqartinneqalernissaanik sunnigaasussaavugut.

Pissutsit taamaanneranni Nunatsinni Inatsisartut Kommunillu akornanni aningaasaqarnikkut naligiissarinerup sunik tunngaveqarluni pisarnissaanik oqallinnissamut siunnersuuteqarpugut. Isumaqaarpugut Inatsisartut, nunamut tamarmut tunngasutigut oqartussaasuusut; naligiissarinermi suut tunngavigalugit agguaassisooqartassanersoq isummersorfigisariaqaraat. Uagut innuttaasunut sinniisutut qulakkeertussaavarput naligiissariniarnermik suliaq avissaartuutitsinani isumaqatigiisitsissasoq.

Naligiissarinerup oqimaaqatigiissakkamik naapertuilluartumillu periuseqarluni pinissaa tamanit oqaatigineqareerpoq, aammali naatsorsuinernik tutsuiginartunik tunngavissaqannginneq Naalakkersuisunit massakut atuuttunit taakkualu siullinit nalunaarutigineqarluni. Tamakku tunngavigalugit Inatsisartut oqimaaqatigiissarinermi suut eqqarsaatigineqassanersut, suut pingaartinneqassanersut, minnerunngitsumillu suut siunertaassanersut tikkuussinissaat kissaatiginarpoq, Naalakkersuisut suleriaqqinnerminni tunngavissarissaarneruniassammata.

Nunatsinnut tamarmut aningaasarsiornikut siuariartornissaq pingaarnertut siunertaa-sariaqarpoq, aningaasarsiornierup siuariartorneratigut aatsaat tamatta agguaqatigiissinnaasagut annertusiartorsinnaammata. Paarlattuanik tamatta atugarliornerulernissatsinnik aqqtis-siuussisoqalerneranik ernumasoqarpoq, ingerlalluartut ipisinneqaratarsinnaanerannik aarlerisoqarluni.

Kommunini Inatsisartunilu Inuit Ataqatigiit sinnerlugit qinigaasimasugut isumaqaarpugut naligiissarinermi tunngaviusut siunertaasullu ammasumik oqaluserineqartariaqartut. Partiit allat qanoq isumaqarnerat tusassallugu qilanaaraarput. Naligiissarinermi naatsorsuinerit sunik tunngaveqassanersut partiinit qanoq isumaqarfigineqarpat? Uuttutit suut atorineqassappat aamma sooq? Siunertaq pingaarneq suussava? Iluatsitutut oqaatigineqassappat taava tamatumunnga suna uuttuutaassava? Qanoq ilinerani naligiissarinnikkut siunertat anguneqarsimasutut oqaatigineqarsinnaassappat?